

Inatsisartut aalajangiiffigisassaattut siunnersuut

2015-imi Inatsisartut ukiakkut ataatsimiinnissaannut Nuussuarmi Upernaviup nunaqarfiisa ilaanni nutaamik illu sullivimmik nakorsiarfittalerlugu sananermut atatillugu pissutsinik aningaasatigullu tunngasunik misissuinissamut Naalakkersuisut peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasortaq Hans Enoksen, Partii Naleraq)

Akissuteqaat

Peqqissutsimut Naalakkersuisoq

Siullermeerinnineq

Nuussuarmi Upernaviup eqqaaniittumi illu sullissivimmik sananikkut pissutsinik aaqqiinissamut siunnersuut qujassutigaa.

Upernaviup pigisaani Nuussuarmi illu sullissivik innuttaasunik sullissivittut napparsimmaveeqqattullu atorpoq, ingerlanneqarneralu immikkoortillugu avinneqarluni Qaasuitsup Kommunanillu Peqqinnissaqarfimmillu akilersugaalluni.

Nuussuarmi illu sullissivik, pingaartumik napparsimmaveeraq peqqinnissaqarfimmit akisussaaffigineqartoq, nunap qeriuannartup aakkiartulerneranik annertuumik eqqorneqarpoq.

Taamaammat 2014-imi upernaakkulli napparsimmaveeraq nunaqarfimmi sulisunut inissiamut atorneqanngitsumut nuunneqarnissaa Peqqinnissaqarfimmit sulissutigineqalerpoq. Illup allanngortiterlugu suliarinerata 2015-imi upernaakkut naammassinissaa, taamaalillunilu Peqqinnissaqarfiup nunaqarfimmi innuttaasunik sullissinikkut aaqqissuussinermini, sumi najugaqarneq apeqqutaatinnagu innuttaasut assigiimmik sullinneqarnissaasa anguniarnissaanut inatsisitigut tunngaviusoq naapertorlugu, sullissiinnarsinnaanissaa naatsorsuutigineqarpoq.

Tamanna tunngavigalugu, Peqqinnissaqarfiup pilersaarutaareersoq naapertorlugu napparsimmaveeqqamik pilersitsiniarneq naammassinissaa, Naalakkersuisut inassutigaat. Illumik sullissivimmik pilersitsinissaa Naalakkersuisut kommunip suliassaattut isigaat.

Tamanna tunngavigalugu siunnersuutip itigartitsissutaanissaa inassutigineqarpoq.